

84 (2Рос-Ко)

У 51

Виталий Уляшев

А МИ  
ВОЙВЫЛЫН,  
КОМИЫН  
ОЛАМ...





*Виталий Уляшев*

# ***А МИ ВОЙВЫЛЫН, КОМИЫН ОЛАМ...***

*Кывбурьяс*

Сыктывкар  
Коми книжнӧй издательство  
1995

Уляшев В. В.

У 51 А ми Войвылын, Комиын олам. Кывбуръяс. —  
Сыктывкар: Коми книжнӧй издательство, 1995. — 64  
л. б.

**ISBN 5-7555-0534-9**

Виталий Уляшевӧн кывбуръясыс унаысь нин петавлісны "Войвыв кодзув" журналын, "Коми му" да "Парма гор" газетъясын. "А ми Войвылын, Комиын олам" — авторлӧн медводдза гижӧд чукӧр, кодӧс вӧлі вӧзйӧма лэдзны Коми республикаса том гижысьяслӧн семинар вылын. Аслас кывбуръясын сійӧ сӧстӧм, сӧлӧмысь петан кывъясӧн гижӧ Коми му, сылӧн помасьлытӧм мичлун, морт да вӧр-ва костын топыд йитӧдъяс, радейтчӧм йылысь, зільӧ донъявны олӧм вояссӧ, бурсӧ и омӧльсӧ.

**84.2 Рос-Коми**

У  $\frac{4702290200 - 002}{M 128 (03) - 95} - 95 \text{ м}$

ISBN 5-7555-0534-9

© Уляшев В. В., 1995

© Коми книжнӧй издательство, 1995

# ЧУЖАНИНЫД ПЫР НА ШОНТАС

## *Тани муыслон шорыс*

Гулыд ягöй, вöрса варов ёльöй,  
Ме бöрын на овны-вывны кольöй.  
Эска öд ме, лöняс лэчыд черыс,  
Ловзясны сэк увтасин и керöс.

Тэнö, Парма, кыла.  
Тэ йылысь и сыла.  
Копыртчыла, шуа:  
"Шудыс медым туас..."

Сё во мысти ме моз кодкö тани  
Эжва юкöд сёрни лöня панас,  
Сиас, медым нэмъяс вöли сöстöм,  
Быд асыв мед кыа сийöс öзтö.

Ылі Войвыв муас  
Быд туй менö нуас...  
Йöз муас ог ылав, —  
Тэон ола-выла.

Тöдö татчöс олысь — том и пöрысь, —  
Сöмын тани муыслон и шöрыс.  
Медся на тай кыпыд сэни овны,  
Кöни чужим, кöни петас ловным.

Мөдлаын оз шонты  
Тадзисö и шондi.  
Парма — менам гортöй,  
Гажлунöй и ёртöй.

### **Коми морткөд сёрни**

Шуа тэныд: "Эн рочась,  
Кор мен чургөдан ки..."  
Мыйла сёрнитам шоча  
Мамлөн кыв вылын ми?

Гашкө, яндысян, ёртöй,  
Мый эн мөдъяссиянь чуж?  
Туйыд вайөдас гортö,  
Кöни олөмлөн вуж...

Сийöс (вужсö) ас муысь  
Кöсьян ачыд — он берт, —  
Вöтын чеччылас гуысь  
Батьыд, висьтавны мед:

"Пиук, эн янөд асьтö,  
Тöд и пиыды шу:  
Вöльнöй светыс зэв паськыд, —  
Сöмын эм аслад Му..."

Тадз кö лоас, оз вош на  
Коми сёрнилөн гор.  
Мукöд йөз пөвстас вошны  
Эн на менö тэ кор.

Эска, сьөлөмад олö  
Войвыв Муыслөн би...  
Шу вай комиён: "Чолөм!",  
Кор мен чургөдан ки...

## Гортын

Чужаниныд пыр на шонтас...  
Кузь туй бõрын пывсян ломтас  
Менам чой.  
Сылõн дась нин небыд корõсь,  
Югыд ваыс изъя шорысь —  
Пõtтõдз кой!

Горшõс мавтыштас, оз кырышт,  
Пывсян бõрын быгъя ырõш.  
Бара том!  
Кадыс мед кõtь вывти сёр нин,  
Дыр на кыссяс варов сёрни —  
Абу пом.

Сьõлõм гусьõн меным шõпкõ:  
"Бокын олiгад тэ õтка —  
Позтõм кõк.  
Олан вужйис, выныс сэнi,  
Кõни гõрддзавлiсны тэныд  
Коркõ гõг..."

Сиктса тõждлунъяссõ, вõлõм,  
Пыр на кылõ менам сьõлõм, —  
Абу кын.  
Эм кõ збыль вылõ, дерт, Енмыс,  
Сõмын чужанинын, сэнi  
Сетас вын.

Медым Эжва йылас сямми  
Дзугсьõм олõм выльысь панны...  
Õзта сись,  
Медым бательысь-мамлысь мусõ  
Миян веськодълун эз кусõд  
Да эз кисьт.

Чужаниныд пыр на шонтас...  
Оз нин чой, а ачым ломта  
Пывсян пач...  
Кузь туй вайөдіс бөр гортө,  
Көні дзоля дырйи коркө  
Сейлі кач.

## **Коми да Русь**

Коми мулы нэмъяс лоны Руськөд,  
Олом вужйыс вөлі медым ён.  
Сөмын ассъыс нимсө мед эз уськөд,  
Төдіс ассъыс асшөрлун да дон.

Рочьяс пөвстө пыр кежлө мед эськө  
Менам коми войтыр эз жө вош.  
Өта-мөдтө он кө кедзовт-дзескөд,  
Сөвман туйтө лөгалөм оз потш.

Медым эськө челядлөн тшөтш челядь  
Коми кывлысь паськөдісны гор,  
Медым локтөм мортыс эз жө элясь,  
Лоис сылы парма кызди горт.

Коді талун торйөдчө да юксё,  
Мед көть кывнас, абу сійө сюсь.  
Төда, эска: нэмъяс чөж оз дзутсы  
Топыд гөрөд — Коми Му да Русь.

## **Лышкыдлун**

Вөр-ва туйяссө нэм пом орөдас...  
Бара эновтас чужан горт.

Войыс суас кө, узяс зорөдас —  
Лысьом шойччөдас коми морт.

Оз ков ордымыс — вуджас веськыда  
Кыпыд ягъяс да кыддза рас.  
Көнкө дзугсяс кө, туйсө веськөдас  
Вөрлөн ичөтсянь төдса пас.

Корсяс сэтшөмин, көні пувйыслөн  
Өгыр розъясас вошис эрд.  
Йөзсө чуманөн, пестер-туисөн  
Аски вайөдны сэтчө мед.

"Аттьö" кыв вылас шуас: "Сетöма  
Енмыс быдөнлы чöскыд нур..."  
...Талун зиль мортыд туйö петöма —  
Корсьны тусьясөн öйдөм нюр.

## **Эн кө...**

Эн кө петавлы туйö, он төд,  
Кысянь босьтчö, көн помасьö сийö.  
Овлö югыдөн вой, луныс — сьöд.  
Сьөлөм чискывлö, сотчывлö биөн.

Эн кө радейтлы, мөдлы он ков.  
Сидзкö, муслунсö öзтыны колö:  
Миян арлыдысь сийö оз пов, —  
Бөръя лолөдзыс мортыдкөд олö.

Эн кө вöчлы тэ йöзыслы бур,  
Аслыд мукөдсянь бурыс оз чукты.  
Эн кө томдырсянь янөдлыв юр,  
"Сямтöм" нимсö тэд некод оз пукты.

Эн кө нэм чөжнад гөрлыв тэ му,  
Вошис джынвыйо йитодыс ськөд.  
Мортто виньгыртөм некор оз су,  
Чужан муыс кө олөмас пыкөд.

Эн кө петавлы туйо, он төд,  
Сэні, бокиас, кодлы тэ колан...  
Ылі муясас нулас мед вөт,  
А ми Войвылын, Комиын олам.

### ***Вура тюни***

Шабді дөра эм и сунис,  
Гын тшөтш сюрас...  
Кокньыд, мича, шоныд тюни  
Аслым вура.

Катыд помсянь кывтыд помас  
Талун вуджа, —  
Аддзыласны пөрысь-томыс  
Менсьым уджөс.

Саридз сайысь вайөм көмыд  
Войвыв грездын  
Тшашитчыштны туяс сөмын,  
Оз кө дзезды.

Аслам вурөмторйой — бордьяс  
Кокьясөйлы.  
Джуджыд лым тола ог ордйөд, —  
Мед и вөйла.

Парма ордымъяссө вуджны  
Наөн письта.  
Збоя йөктігөн да уджын  
Дас гоз кисьта.

Сета шабді дөра, сунис,  
Гын тшөтш сета.  
Вур вай, ёртөй, мича тюни,  
Веж кө петө.

### ***Кывза пармалысь мойд***

Арся вöрас кө сёрма,  
Ог на шогö сэк усь, —  
Татшөм чöскыда войнас  
Весиг гортын ог узь.

Коз пу вевт улас меным  
Вичмас аддзывтөм вөт...  
Варов ёль бокас сэні  
Дойсö сьөлөм оз төд.

Лыскыс — вольпась и шебрас, —  
Ог на шойччытөг мун.  
Содгас пармаыс эбös,  
Кодыр личкылас ун.

Аски мөдлаын суас  
Менö татшөм жö вой...  
Төда, сійö мен шуас:  
— Кывзы вөр-валысь мойд.

### ***А ме сулалі шемöс***

Эзысь прöшвисö кыис  
Менам öшиньö кодзид.  
Сэтысь Эжвалөн гыис  
Шоныд керкаам сөдзис.

Сэтысь дзоридзьяс корси, —  
Со тай луд вылас тырыс.  
Ордым котөртис шорсянь,  
Кыддза рас пиас пырис.

Волі гожомас төлын...  
Босьтис менө сэк шемөс.  
Гортын өтнамон вөлі...  
Сэссия-й төд, вөт-ө-вемөс.

## ***Дзодзөглы***

Кыдзи лунвывсянь войвылас письтан?  
Меным өтнамлы, дзодзөгөй, висьтав.  
Мемысь он пов да орччөн со пуксин...  
Шойччөд бордьястө, мөвпгьяснад юксыы.

Менам чужанін мусмөма тэныд, —  
Гажтөм сытөг тэд лунвылас сэні.  
Гожом шөрын мед мыччысьлө пужйыс,  
Менлы моз жө тэд тан олан вужйыс.

Лышкыд Войвылас абу өд йөзын, —  
Тэныд нимкодьөсь Эжва и Лөзым...  
Вай жө шойччышт да бордьяснад шенышт:  
Сюрас лөниныс ю саяс сэні.

## ***Көлысь гора улича***

Эжва пөлөн улича,  
Вылынджык — мөд улича,  
Нөрысас — тшөтш улича, —  
Өтув — Кулөмдін.

Уліас өд мам олө,  
Шөрас менам чой олө.  
Выліас, ой, зон олө.  
Мусук — сылөн чин.

Эжва дорысь сьылысьыс,  
Гудөкаыс — вылісьыс...  
Корө-корө көлысьыс  
Нөрыс йылас сэн.  
Медся улыс улича,  
Сы вевдорса улича,  
Көлысь гора улича,  
Шудсө сий мен.

Гажа сыланкывъясөн  
Воій татчө, нывъясөй.  
Бөрдөдчана кывъяссө  
Кывзам ме да мам.  
Варов да пельк зонъясөй,  
Сибөдчөй, эн донъясьөй,  
Йөктөй да эн конъясьөй, —  
Коми "Шондібан".

## **Чужанінкөд сёрни**

Сыысь, мый тэ татшөм голь да эбөстөм,  
Дона чужаніной, ичөт грезд,  
Менам эм жө мыжыс, абу дзевасын —  
Сылі гөгөр быттьө сира гез.

Шогыс сыын, мый ме тэнө эновті.  
Карса олысь сиктад — сөмын гөсть.  
Сикөс-накөс кольө олөм-вылөмыс, —  
Этша кисьті чужанінын пөсь.

Гора кывъяс, бокинӧсь кор, шулывлам:  
"Чужан сиктӧй сетіс олан борд..."  
Гежӧда тай ассыным ми юавлам,  
Мыйла вуніс, бердіс батылӧн горт?

Мыйла коми кывсӧ вежим роч вылӧ,  
Мыйла талун ас муным оз верд?  
Ягыс, кӧні войдӧр сиктыс вотчыліс,  
Мыйла талун лӧптӧн тырӧм эрд?

Юалӧмгъяс вылас кӧні воча кыв?  
Виччысьӧны сійӧс вӧр и ю...  
Мукӧд моз ог мыжав сӧмын рочьясӧс, —  
Пузвтім ми ставӧн чужан му.

Сідзкӧ, ӧтув ковмас сійӧс ловзьӧдны,  
Медым содіс пармаыслӧн гор.  
Талун мыйкӧ вӧчны, гашкӧ, позьӧ на,  
Аски, тӧда, лоас вывті сӧр.

Эжва йывным ныв-пиянсӧ чуксалӧ,  
Садьмӧдны мед сэні чужан горт,  
Колис медым карсьыс чина пуклӧссӧ  
Сиктысь коркӧ пышйӧм коми морт.

Сьӧлӧмгъясӧн кывны парма дойяссӧ,  
Кольны вежсян олӧмас бур пас  
Корӧ талун вокъясӧс да чойясӧс  
Зараванас ойдӧм кыдза рас.

...Менам кӧсйӧм ясыд да и ӧда на:  
Комиыслӧн туйвизь мед эз ор,  
Медым миян муса ичӧт Рӧдина  
Водзӧ вылӧ миянӧс эз ӧр.

## **Комиын ола...**

Чужи Комиын, Комиын ола.  
Дерт жö, ас Мулы мыйтакö кола.  
Сийö нэм чöжыс мекöд, ме — сыйкöд.  
Öта-мöдлы ми мыджöд и пыкöд.

Чужи Комиын, Комиын кула.  
Олан туй помлань нёрам ми мулань...  
Сöмын тöдöй тi, ягъяс да ёльяс:  
Лолöй тiянкöд овнысö коляс.

## **Öтув овнысö**

Тайö — менам улича.  
Танi — менам горт.  
Карнан сэнi каличыс, —  
Ме öд коми морт.

Кодысь меным повнысö?  
Сиктыд сикт и эм...  
Öтув ставлы овнысö  
Енмөн сетöм нэм.

Ассьыс бур ним лякöсьтны  
Некод тан оз мöд.  
Мортыс мортсянь пакöсьтсö  
Ичötсянь оз тöд.

Тайö — тэнад улича.  
Танi — тэнад горт.  
Кöсья, мед көрт каличсö  
Вунöдiс быд морт.

## *Сыктыв юй, Сыктылӧй*

Мысся муысь сӧдзӧм ванас,  
Кузь туй бӧрын воа кор  
Сэтчӧ, кӧнӧ юлӧн панас,  
Кӧнӧ Сыктыв юыс — шор.

Сыктыв юй, Сыктылӧй,  
Югыд ванас тыр.  
Сылӧн морӧс кыптывлӧ  
Тувсов кадӧ пыр.

Ва кывтчӧсыс пыжӧй нуас  
Сэтчӧ, кӧнӧ юлӧн вом,  
Кӧнӧ Сыктыв Эжва юас  
Вӧйтас ассьыс ӧтар пом.

Босьтас сывъяс ыджыд чойыс  
Ичӧт чойлысь вын да от...  
Оз нин Сыктыв юсьыс войыс  
Югыд кодзувъяссӧ вот.

Сыктыв юй, Сыктылӧй,  
Югыд ванас тыр.  
Сылӧн морӧс кыптывлӧ  
Тувсов кадӧ пыр.

## *Ӧзйис востым*

Енэж шӧрас ӧзйис востым.  
Оз ков сылы туй да пос.  
Со нин сійӧ кык пу костын —  
Ичмонь кыз да пашкыр коз.

Кодӧс кутлас биа востым?  
Дойсӧ некодлы ог си...  
Мед жӧ эськӧ кык пу костын  
Муас пырас енэж би.

### ***Войвыв мукӧг***

Эг и тӧдлы — вои батьӧ,  
Эг и тӧдлы — лои пӧль...  
Гӧтырлы да пилы аттьӧ  
Сыысь, мый ме абу гӧль.

Шудыс миянӧс эз ордйӧд.  
Мед на овны уна во!  
Нывным пӧла; пиным бордъя,  
Ме да гӧтыр кургам со.

Миян дача — дзоньнас вӧрыс:  
Гулыд яг и паськыд нюр.  
Пестер-туисӧ мый тӧрас,  
Ваям гортӧ — чӧскыд нур.

Туйсӧ лунвылӧ ог кутӧй, —  
"Ловъя" васӧ вӧзийӧ ёль.  
Кӧсьям, медым Войвыв Мутӧг  
Весиг ӧти лун эз коль.

### ***Олӧмыс песӧ...***

Ог кӧ вермы, нель кокӧн на кысса  
Сэтчӧ, кӧнӧ дзоридза тай луд.

Содз тыр өкта лысвасö да мысся, —  
Бурдтöм висьöм оз-ö сэки бурд...

Шогысла кө синваён ме ойда,  
Ёрны сэки олöмсö ог кут.  
Тöда öд ме — талун сійö дойдас,  
Аски, гашкö, вичмöдыштас шуд.

Мусмылас кө меным курыдторйыс,  
Воас кад да паляла на бөр.  
Донöдла сэк гөрдөдз пывсян горйöс,  
Корöсь пыдди коляс китыр ньөр.

Олөм песö... Бурас пыр на эска, —  
Эм öд көнкö мывкыдлун да мезд!  
Но а талун сьөлөмлы, ой, дзескыд:  
Коньөр туйöдз воис чужан грезд...

### XXX

Өкта лысвасö войт бөрся войт.  
Со нин содз тырым чукөрті сійöс.  
А кор асылас йиджтысяс вой,  
Öзта лысвасö кыалөн биён...

# ТӖДЛАМ ОЛӖМ ДОЙЯССӖ

---

## ТӖдлам олӖм дойяссӖ

Дойдӗ олӗмыс,  
А ми олам.  
Шудӗн волӗмыс  
Овлӗ сола.

Курыд шогсӖ ми  
Венлам гусьӗн.  
Мудзӗ кок сӗнним,  
А ог усьӗй.

Олӗм олысьлы  
Быдтор сюрӗ:  
Небыд вольпась и  
Чорыд юрӗс,

Сотчысь муслуныс,  
Сылӗн тшыныс,  
Аслань сюсьлуныс,  
Ковтӗм выныс...

Олӗм олысьыд  
Быдтор тӗдлӗ:  
Шудкӗд волысьӗм,  
Шогас пӗдлӗм.

350770

Шудкөд курыдыс  
Орччөн олө...  
Дойяс бурдодас  
Ачыс олөм.

## *Эн менө ёр*

Батьёс арлыдөн регыд суа...  
Комын во чөж нин сійө сэн —  
Посьнас киськалөм чужан муас,  
Кодөс козьналіс-колис мен.

Колис төравны, бура видзны  
Ассьыс чөс туйяс, вөрса ёль.  
Мортлы шуёма Енмыс сідз нин —  
Вөчтөм уджъястө мөдлы коль.

Эськө вермис кө, батьё видіс:  
Зумыд пелыстөм олан пыж...  
Мыйла сыөн на тшупөм гидас  
Оз нин баксыны мөс да ыж?

Мыйкө вөчлі жө — да эг ставсө,  
Кызкө олі жө — да эг сідз...  
Этша юлывлі ёльсьыс васө,  
Этша ытшкывлі батьлысь видз.

Менө ышөдө сөмын сійө —  
Олөм дойясысь эг на нёр...  
Олі ас ногөн. Менө пиён  
Лыдды, батьё, да эн жө ёр.

## **Воны өти кывйö**

Öдзöс вугйысь он нин аддзы палич —  
Ортсысянь да пытшсяньыс дас калич.  
Тöдтöм мортлы оз шу некод чолöм,  
Миян пытшкö ставлөн йөрмис полöм.

Кодлөнкö мед сьөлöм висьö-ёнтö,  
Öта-мөдöс бур кывйөн ог шонтöй.  
Вежавидзöм морöсьяс оз дзескöд,  
Абу нин и йöзлөн йöзлы эскöм.

Ставөн сöмын сёрнитам да вензям,  
Важсö кисьтам, сэсся öтув шензям,  
Мыйла весиг эмыс вошис-бырис,  
Абутöмыс мыйла йöзсö зырис?

Шуöны тай, выль олöм пö дорам...  
Сöмын мыйкö важсö дыр нин ёрам...  
Вежсьёмгьяслы бурланьö, дерт, лоны,  
"Вылиас" кö öти кывйö воны.

## **Нэм олöма**

Мыжыс сыын, мый чужис,  
Мыжыс сыын, мый кужис  
Нэм чöж бергöдны медсьökыд удж.  
Мыжыс сыын, мый пöрысь...  
Коркö вöли жö гöрысь, —  
Öни сойяссö важ моз оз пудж.

Мыжыс сыын, мый верöс  
Этша олöмас керис:  
Мунис тышö да бöрсö эз лок.  
Мыжыс сыын, мый муслун

Война кадас и кусліс,  
Отнас нэм чөжыс пальөдіс шог.

Мыжыс сыын, мый чөжліс  
Сійө озырлун йөзлы...  
Муас вөйөм нин керка и эм.  
Нөшта тшыг сора олөм,  
Корны петөмысь полөм,  
Керка пельөсын чөв олысь ен...

Чужөмбангъясас – синва...  
Кодлөн сьөлөмас инмас  
Нэм пом аддзысь нин мортыслөн дой?  
Коді сюсь, коді колысь,  
Сійө талун и олысь...  
Сійөс кодлөнкө шогыс оз дойд.

### **Вола сиктө**

Вола сиктө, рөдвуж ордө.  
Лоа важ моз варов, шаньөн.  
Эн ті дөзмөй, мый ме кортөг, –  
Чөсмөдлыштөй рача няньөн.

Абу тшыг ме, абу корысь, –  
Пөсь нянь бөрас аттьө шуа.  
Югыд васө изъя шорысь  
Синва сорөн көш тыр юа.

Менө гөгинь тайө ванас  
Мыськис-лелис, кор ме чужи.  
Олөмөйлөн тані панас,  
Тані олөмөйлөн вужйыс.

Вои кө ме пөсь нянь корны  
Талун аслам рөдвуж ордө,

Сөмын сы вöсна, мый сёрми  
Воны ас кадö ме гортö.

Мамөн кётöм няньшом көрыс  
Менсьым мудзöс оз нин личöd...  
Сикт мыш вылын шойна нöрыс  
Содис мамлөн нимөн-вичөн.

Ен ув пельöс водзын шуа:  
— Вошйыв, сибödчывлы, шаньöй...  
Мамук гу вылö ме нуа  
Меным вичмöм рача няньöс.

### **Эска аскиа лунас**

Кутшöм кывйыс öд — эскöм!  
Кöсья, сьölöмъяс мед  
Сийö некор эз дзескöd  
Меным, сылы да тэд.

Медым вир-яйödз йиджис,  
Индис олöмас визь,  
Медбур гижысь мед гижис  
Эскöм йылысь выль висьт.

Медым петкödчис сэнi  
Джуджыд вежөр да сям,  
Зыксьöм-пинясьöм венис...  
Бурлань зильöм оз ям.

Кöсья нимöдны мортöс  
Ыджыд шыпассянь пыр,  
Медым гөстьясөн гортöй  
Вöли важ мозыс тыр.

Медым кыгчө көть муні,  
Лои быдөнлы ёрт.  
Эска аскиа лунас,  
Эска — ловзяс на горт.

### **Жугыль мөвпъяс**

Нэм чөж олі эг сідз, кыдзи көсйи...  
Сьөлөм бөрдіс, а энөвтi горт,  
Медшань нылыс мен муслунсө вөзйис, —  
Аскөд кузь туйө сійөс эг кор.

Коса-куранөн дзолясянь нокси, —  
Видз-му вөчысьыс меысь эз пет.  
Бокын олігөн грезд вөсна шогси, —  
Сылы эбөсөс, вынөс эг сет.

Көсйи мамукөс ас дорө босьтны,  
Вои сы дорө, петіс кор лов.  
Зіли шудыслысь өдзөссө вөсьтны, —  
Аддзө Ен — йөзсьыс бура ог ов.

Нэм чөж мыйөкө, кодлыкө эски...  
Кольөм кадсө он бергөд, он кут.  
Чайті — шудыслы морөсын дзескыд,  
Меным шуөны — водзын на шуд.

Нэм джын вуджөма, сэссия нө кыгчө,  
Да и кодарө бергөдны туй?  
Олан визулыс кыскө, ой, сэтчө,  
Көні вабергач — бөрсө он уй.

Сьылөм-гажөдчөм важөн нин вуніс,  
Оз кыв том кадся гудөклөн шы...  
Зильө эскөдны миянөс туныс,  
Вевтгяс Мусө пө бушкала гы...

Татшөм лёкторйыс мед жө оз сулы  
Некор олөмсө... Сөрө, дерт, тун.  
Төда, воас на миянлы тулыс,  
Эска, воас на гажаджык лун.

## ***Олан вуж эн берт***

Мамөн вурөм дөрөм коркө новліс,  
Новліс коркө мамөн вурөм гач.  
Айөн лэптөм керкаын сэк овліс,  
Чөскыд көвдум пөжавліс ас пач.

Оланінсө вузалөма мөдды.  
Шойна вылын важөн бать и мам.  
Чайтіс, сьөлөм дойсө оз нин төдды,  
Сөмын некыдз курыд дой оз ям.

Олан вужтө бертыштан кө вөлөм,  
Вунөдан кө чужанінө туй,  
Мукөддырйи сідзи жмитглас сьөлөм —  
Сэсся юртө петляө көть суй.

## ***Челядьдырас вола***

Олі челядь дырйи мамкөд, батькөд.  
Эг ме кывлы насянь ёрччөм, матькөм.  
Дөзмөдлі кө найөс, лёк кыв пыдди  
Вөсньыд ньөрйыс молитвасө лыддис.

Сы бөрын на-й вежөр, гашкө, содліс,  
Курыд дойөн вольпасьө эг воддыв.  
Быдмысь мортлы чужан поз мый сетіс,  
Сійөн на и кузь туяс ме петі.

Абу нин тай важкодъыс ме öнi, —  
Олöмас öд тöдлi няйт и сөнiк.  
Гора кывсö шуывла, кор колö,  
Лöгавла, и люкавлö съöd полöм.

Ньöрйыс пыдди киö тасма босьтла.  
Ньöжмывлö и олан туяс восьлас.  
Джöмдывла кор, челядь кадас вола,  
Бать-мамтöг көть комын во нин ола.

# САДЬМИ КЫАКӨД СО ТАЙ...

---

## *Пармалөн мойг*

Садьми кыакөд со тай,  
Босьтї сюмөдысь доз.  
Вөрса ёль бокысь вота  
Чөскыд, кисьмөм нин оз.

Эн жө муас тэ усь,  
Шондї чужөма тусь —  
Войвыв Муыслөн юм,  
Гожся луныслөн нюм.

Йөзсьыс медводз ме чечча,  
Корся медыджыд яг.  
Менам мыш сайын лэччас  
Гортө пестер тыр тшак.

Сиа, Пармай, тэд,  
Лоин лышкыдөн мед,  
Кыдзи став Коми му  
Да быд ёль, да быд ю.

Прөст кад сюрас — ме нюрө,  
Медым ва выв и ув...  
Медбур козиныс сюрас  
Сэтысь мен — турипув.

Сылөн сөкыс оз вош, —  
Во чөж веськөдас горш.  
Воис кад — абу водз,  
Вота содз бөрся содз.

Льом да сэтөр, да өмидз  
Менө короны: "Вот! —  
Шонді кисьмөдіс помөдз..."  
Бара эновта горт.

Мудзыс сьөлөм оз дойд...  
Арыс — Пармалөн мойд.  
Сійос лыддыны Ен  
Сетіс меным дзонь нэм.

### *Пывсян ломта*

Корось вундыны ме кая  
Кыддза раскө.  
Сійос кызь гоз гортө вая.  
Волы аски,

Волы аски, орччөн олысь, —  
Пывсян ломта.  
Пөрысь лысьөмнымөс корось  
Ок и шонтас!

Горйө коян ваас кисьтам  
Быгья ырөш, —  
Оз-ө пытшкөс дзуртөм-висьөм  
Сэки бырышт?

Быттьө выльысь ловзям-чужам  
Ме да ёртөй.  
Небыд луд вывті ми вуджам  
Сэсся гортө.

Ыргөн самөварыс сетас  
Вын да эбөс.  
Пөсьыс пыдзыртмөн мед петас, —  
Абу жебөсь.

Самөварысь ваыс тюрас  
Бөрья войтөдз.  
Курыдтортөг варгам бура  
Ми сёр войөдз.

Волам ваяс, водзө вылө  
Мөвпгьяс ёсьтам...  
Самөварным бара сьылө, —  
Кушөдз косьтам.

### *Нюжөдiс нэм*

Пувйөн да тшакөн  
Чөсмасьө кар...  
Колода ягө  
Вола быд ар.

Кузь мед и туйыс, —  
Ог нюжмась дыр:  
Пестер и туис  
Рыт кежлас тыр.

Менсьым важ ордым  
Некод оз вудж:  
Тані ме — гортын,  
Карын көть удж.

Кадыс оз чышкы  
Томдырся пас, —  
Важ моз на лышкыд  
Ельдөга рас.

Өзтылас сьөлөм  
Вөр-валөн гор,  
Кадам ты пөлөн  
Восьлала кор.

Копыртча арлы, —  
Сійө өд мен  
Чинтыштіс арлыд,  
Нюжөдіс нэм.

Пувйөн да тшакөн  
Чөсмасьө кар...  
Бара со ягө  
Чуксалө ар.

### ***Видз вылын***

"Со ме сувті!" — горөдіс  
Дас пинькоста зорөдыс  
Ласта вылас сэн.  
Чөвтіс Прокө, Кольөыс  
Шыльөдіс да мольөдіс.  
Сямлунныс тай эм!

Кымөрсө видз нерыштас,  
Өні пө мед зэрыштас, —  
Чукөрын быд сі.  
Сиктысь том йөз, пөрысьыс  
(Дась нянь сөйысь, гөрысьыс)  
Видз вылынөсь ми.

Луныс рытлань пөрөма.  
Ки-кок мян вөрө на —  
Потшам зорөд йөр...  
Гортө вуджтөдз олыштам

Зорёд бокас, лолыштам  
Косъмём турун көр.

## **Майбыр**

Кокныд, тэрыб вöраснад,  
Майбыр, помтём вöръяссö  
Муртавнысö тэд.  
Аслад зильём-колёмөн,  
Майбыр, паськыд олөмас  
Корысьөн он пет.

Нюмнад, мелі кывъясөн,  
Майбыр, акань нывъясös  
Том дырйи эн дойд.  
Мывкыд мортлы вичмөма  
Сиктысь медшань ичмоньыс, —  
Сыкөд олөм — мойд.

Майбыр, ыджыд вежöрыд  
Йöз муас эз кежöдлы, —  
Төдін ассыд горт.  
Майбыр, вежавидзёмөн  
Локтысь лунас видзөдö  
Уджач коми морт.

## **Менам ордым**

Гожём шöрын, а ог төлын,  
Локта татчö,  
Кöні раскас, Эжва пöлөн  
Ордым гартчö.

Ордым гартчө, ордым корө  
Менө, нылөс, —  
Ласта вылас, сус пу дорө,  
Гортсянь ылө.

Менам мусук вугыр шайта  
Сэни шогсьө.  
Оз ков чери сылы, чайта, —  
Менө корсьө.

Медым виччысыштас ёкыш  
Сэни юас.  
Оз кө сёысь зонмыс окышт,  
Йөйөн шуа.

Вугыр табйыс оз и вөрзьев,  
Дзугам көвсө.  
Чери пыдди зонмыс сьёрсьыс  
Нуас пөвсө.

Кыддза раскөд, Эжва пөлөн  
Ордым гартчө...  
Шудла волі (төдіс сьөлөм)  
Талун татчө.

### **Мамлөн кияс**

Ветлө тэрыба кияс шыран...  
Кута бальөсө, мамө шырас.  
Нигөн вурунсө нистан летас,  
Печкан ёкмыльысь шөртыс петас.

Чёрсыс гартас да путшкас бура, —  
Со нин чуманын ыджыд турас...  
Тайө кывьяссө мамлы сиа —  
Быд удж вөчлісны зарни кияс.

## *Пыр мыйкө колө*

Ыж куысь пасьсө  
Вурліс тэд пöль...  
Ньöб талун дасьсө,  
Абу кө гөль.

Доныс тай, доныс! —  
Сингьясыд — көш:  
Сы вылө вонас  
Сьöмсө он чөж.

Колө на-й көмкот...  
Тірзьялас льöб:  
Мешöк джын сьöмтöг  
Сійöс он ньöб.

Сө мокасыт олөм,  
Бурман тэ кор?  
Пыр мыйкө колө,  
Юрöй көть дзор.

## *Когі повзис?*

Ошкөд паныдасис вöрын  
Серамбана коми морт.  
Нюмдіс ошлы, шуис: "Тöрам,  
Паськыд пармаыслөн от..."

Ошкыд коми кывтö тöдö,  
Сöмын варгыны эз мөд...  
Колис пассө пувйөн-чөдйөн.  
Повзис?  
Гашкө, вөлі пöt?

## ***Коми оласног***

Медым быдми, небыд гум  
Эжва пөлөн өктывлі.  
Пачын пөжөм рудзөг юм  
Вирөс ворсны тшөктывліс.

Лыяс чорзисны мед, ляз  
Меным мамөй пулывліс.  
Заравасө, кыддза рас,  
Тэнсьыд пөттөдз юлывлі.

Гырнич выльөв ме быд рыт  
Нимкодпырысь пөрөдлі.  
Тасьті чукйыс азя шыд  
Сы бөрын на төрөдлі.

Сола чими черинянь  
Мамлөн эз вөв дзебасын.  
Нөгыль рокыс (сувтө пань)  
Содтыліс тшөтш эбөсөс.

Паренчаөн тыртлі зеп —  
Чөсмөдлыштны аньясөс.  
Юмов ырөшысь, ог дзеб,  
Гөрдөдлісны банъясөй...

Сьөлөм вылысь вешйы, шог!  
Вура парка — пасьтала.  
Төда: коми оласног  
Ловзяс на да паськалас.

## ***Көні пармаыс гзор***

Менам сьөлөмөй сьылө,  
Пета вөр-ваас кор.

Нуас чös туйыс ылö,  
Кöни пармаыс дзор.

Кöни идöртöмлуныс  
Эз на ягъяссö дойд,  
Кöни войыс и луныс —  
Енмөн козьналөм мойд.

Паськыд туйсö ог писькөд, —  
Коля тыдавтөм пас.  
Чера йöзлы ог висьтав,  
Кöни кыдз пуа рас.

Джуджыд пожöма нöрыс  
Мекöд мелі да рам.  
Кöсья, аддзис мед вöрыс  
Менсьым, тэнсьыд бур сям.

Тöда, быдөнлөн сьылас  
Сьөлөм пармаас, дерт,  
Сэн кө этшаджык тыла —  
Нюрөн поньталөм эрд.

## *Корö вöртас*

Кытчö ылыстчан тэ, вöртас?  
Тэнö некыдзи ог су.  
Вола ягас, вола сьöртас,  
Вуджа лыдтөм ёль да ю.

А тэ меысь водзö пышгьян, —  
Он тай, майбыр, ме моз мудз.  
Пельпом вывсьыд лыска чышгьян  
Киөн малыштны ог судз.

А өд кӧнкӧ шондӧ сӧнӧ —  
Вӧртас саяс шойчӧ пыр.  
Кыдзи эськӧ сэтчӧ воны?  
Оз-ӧ вынӧй менам быр?

Вӧртас чуксалӧ да корӧ:  
— Кытшовт мекӧд чужан му...  
Чечча водз да вода сӧрӧн, —  
Ог-ӧ збыльысь сӧйӧс су.

### *Вунлытӧм пас*

Татӧ том дырйи ветлывлӧм важӧн,  
Танӧ томлунлӧн быдлаын пас.  
Со тай сӧксянь на куслытӧм гажӧн  
Нюмдӧс миянлы верстяммӧм рас.

Мортлы сӧлӧмас уна зӧв тӧрӧ —  
Тӧдлӧм шогыс и вичмывлӧм шуд.  
Вояс пырыс ми видзӧдлам бӧрӧ —  
Сӧнӧ кыкӧн ми, вой да веж луд.

Тӧ нин пӧч, менӧ шуӧны пӧльӧн  
Миян челядӧлӧн нывъяс да пи.  
А ми важ моз на муслунсӧ лелям,  
Кодлысь танӧ ми ӧзтывлӧм би.

Уна во бӧрын воим ми татчӧ,  
Кӧнӧ юыскӧд синмасьӧ рас...  
Танӧ быдлаысь, мусаӧй, аддзам  
Кольӧм том кадлысь вунлытӧм пас.

## **Гожом йылысь вӧт**

Кыдз пу зарни коръяссӧ  
Чӧвтіс ёльяс-шоръясӧ, —  
Кадсӧ он тай пык...  
Тӧв кежлӧ нин вӧччӧма,  
Сарапансӧ пӧрччӧма, —  
Вылас еджыд мыг.

Орчча козъяс зільӧны  
Ичмонь кыддзӧс гильӧдны, —  
Небыд налӧн рой.  
Чоюкӧс пӧ шонтыштам,  
Лыс шебраснас поньтыштам,  
Мед оз кынты вой...

Сӧмын кыдзлӧн олӧмас  
Уна тӧв нин волӧма.  
Майшасьӧм оз тӧд.  
Кӧдзыдыс кор ёнтыштас,  
Сэки кыддзӧс шонтыштас  
Гожом йылысь вӧт.

## **Гожся войтъяс**

1. Гортыс уджӧн тырӧма,  
Потшӧс киссьӧ...  
Сылы вирас пырӧма  
"Чери виссьӧм".

"Чери виссьӧм" Коляӧс  
Гортсыйс кыскас.  
Быттьӧ ачыс омӧлыс  
Тойлӧ мышкас.

Сьӧкыд висьӧм домалис  
Сійӧс шайтас.  
"Юсӧ, тысӧ помала", —  
Коля кайтӧ.

Том гӧтырыс "ойясӧ"  
Мыйта лыддис!  
Юрлӧс кутлӧ войясын  
Кольыс пыдди.

Шогсьӧ, кытысь босьтчасны  
Пиян, нывъяс,  
Гача ёртыс кольччас кӧ  
Висьӧм сывъяс?

2. Гӧтыр яйӧн мед оз верд,  
Петыр Павел, чери сет.  
Ачыл тӧдан — сыысь бур  
Вӧльной светас абу нур.

Чер пу кузьта ысты сын,  
Да мед шедас, а оз мын.  
Сэки аттьӧ шуа тэд —  
Пашук, мӧд на шедас мед...

3. Табйӧс вӧрзьӧдис... А кодӧ?  
Ачым ме ог тӧд.  
Мед жӧ эськӧ сійӧ ёдӧ,  
Кодлӧн мышкыс сьӧд.

Лэптӧ шайтӧс да и чуйми —  
Вугыр помын ёс...  
Гашкӧ, аслым ваас уйны —  
Корсьны ёдӧ поз?

4. Кытысь корсьны сэтшӧминсӧ,  
Кӧнӧ тӧлыс мед эз пӧльт,  
Да и шондӧйс эз инмы,  
Мед и йирыс эз вӧв гӧль?

Сэки аддзыласны сямös, —  
Карын олігад эг тшык.  
Дорвыв сёясны бур самös  
Комын сын да комын мык.

Корси, корси да эг аддзы  
Кулём-юысь озыр йир...  
Гашкө, дзикөдз воштіс яндзим,  
Вөтліс черияссö сир?

Гортö вои бара кушөн,  
Колис луныс, колис рыт...  
Дөзмөм гөтыр пөльтіс чушсö, —  
Пуис килькаысь мен шыд.

5. Петыр Павел — чери сетысь,  
Петыр Павел — чери Ен.  
Кора: "Кулём-юысь, сэтысь,  
Вичмөдышт вай чери мен.

Оз ков меным пельса тыр өд —  
Юква вылө сынпи сет...  
Сөмын висьтав, меным дыр-ö  
Тані вердны ном да геб".

Виччыся ме воча кывсö.  
Скөрми весиг, пузис вир...  
Гашкө, Павел чөвтліс тывсö —  
Ачыс куштіс джуджыд йир?

## ***Колö игөрлун***

Коді менö дугөдас  
Радейтны ас му?  
Паськөда ме гудökös,  
Кывзöй, вөр да ю.

Тіян вылын ыждавны,  
Донаяс, ог кут.  
Ті на олөм мыджөдыс,  
Менам гаж да шуд.

Сөмын гожся войясө  
Сьөлөм шог оз ор, —  
Тэнсьыд, Парма, дойястө  
Бурдөдам ми кор?

Олөмыслөн бушколыс  
Вөрзьөдтөг эз коль:  
Ягьяс эрдөдз чишкаліс,  
Косьтіс лыдтөм ёль.

Ковтөг лөп-ёг вольөсыс  
Водзө мед эз сод...  
Челядьнымлы коляс-ө  
Вөрлөн помтөм от?

Көсья на ме эскыны:  
Содас идөрлун —  
Ловзьөдны да пестыны  
Пармаыслысь нюм.

### *Бокысь воём ёртлы*

Важөн лоин Коми мулы асөн, —  
Бокө нуан туй вылас эн кеж...  
Коді өтчыд юас Сыктыв васө,  
Войвыв мусө мөд вылө оз веж.

Олө тан, код коркө тані чужис,  
Олө тан, код локтіс да эз мун.  
Татчөс, локтысь йөзсө йитө уджыс  
Да и войвыв мичыс, код оз вун.

Олөмыс мед лоас пыр тэд лышкыд.  
Аддзан — тэнад тани лыдтөм ёрт.  
Мөд Му вылө войдөр кө эн ыштыв, —  
Нэм помөдзыд тэнад тани — горт.

Чулькйөн на мед пуас тэнад олөм,  
Да оз козьнав тэныд курыд дой.  
Унджыкысь мед шуда луныс волө,  
Этшаджык мед төдлн узьтөм вой.

## ***Мекөд тшөтшьялы***

Шуан тэ, олөм пө колис...  
Дугды вай, сэсся эн сөр!  
Миянлы нелямын нельыд —  
Сөмын на олөмлөн шөр.

Вермам на радейтны пөся,  
Мукөдды козьнавны шуд.  
Муслунтөг овны оз лөсяв, —  
Эз на өд сьөлөмным сувт.

Кутам на овны да вывны...  
Сиа ме аслым да тэд:  
Уна дас тулыс на сывны  
Лымйыслы нэм помөдз мед.

## ***Корсь сэтшөм муслун***

Муслун эз на кө öзйы,  
Сийөс мөдды эн вөзйы, —  
Кутас чискыны нэм.  
Корсь вай ыпьялысь муслун,

Коді кувтөдз оз куслы.  
Эскы — сэтшөмыс эм.

Коркө пöрысьлун суас.  
Мед и сэк кодкө шуас  
Вир-яй пузьöдысь кыв.  
Шудыд вичмывлö кыклы,  
Он кө мөдъяслы юклы  
Муслун бордъяса сыв.

### **Öта-мөдлы олам**

Мыжма кө ме, янөдас да видас,  
Пузьылас, а бергөдчас да рам.  
Медся шаньыс вöльнöй светас — Ида,  
Менам гöтыр, челядьöйлөн мам.

Миян весьтын енэж овлö югыд,  
Миян весьтын енэж овлö руд.  
Олöмыслөн баныс, сылөн гугыс —  
Ставыс тайö öтув — кыклөн шуд.

Мича аньяс вылö синъяс чөвтла...  
Таысь, шаньöй, шогö эн на усь, —  
Бокö тойлысь мутисö ме вöтла,  
Öти вой на бокын ме эг узь.

Лоан коркө пöчөн, а ме — пöльөн.  
Мед и сэк на муслуныс оз берд.  
Нэм чөж öд ми сійöс тэкöд лелим,  
Олін меным, олі-вылі тэд...

## **Көка войяс**

Көкөй, лыдды менсьым вояс.  
Мед көть тэ и абу Ен,  
Висьтав, шаньöй, гоҗся войö,  
Кузь-ö менам олан нэм.

Ку-ку, ку-ку... Сёөдз лыддя.  
Тырмас сэсся, шойччышт вай.  
Овны дыр мен вöзийн — аттьö —  
Мöдды вичмöдышт тшöтш пай.

Öтчыд волö көка кадыс,  
Во гөгöрсö вуджам кор.  
Нэмлысь помсö, дерт, оз матыст  
Көклөн орём сылан гор...

Гашкö, лэбзис ылыс раскö?  
Таысь шогсьыны ог кут.  
Локта-воа татчö аски,  
Кöни вöрса ёль да луд.

## **Батълөн, мамлөн велöдöм**

Водзын мунысьöс эн таяв,  
Бöрсянь локтысьöс эн кут.  
Асья унмысь водзджык паляв,  
Йöзлысь асланьыд эн курт.

Орччөн олысьöс эн пöръяв.  
Муын куйлысьöс эн нöйт.  
Ёртлөн пöв вылас эн дзöръяв.  
Могтöг сикт кузя эн шöйт.

Авъя ичмоньöс эн ылöд,  
Тöд пыр — тайö ыджыд мыж.

Кыдзи кӱсйӱ, мед оз кылӱд  
Визув юыс олан пыж.

Тадзи велӱдывлис батыӱ,  
Бурас ышӱдывлис мам...  
Уна во нин нӱмысь катти, —  
На ног тӱча олан сям.

### **Кывзы сьӱлӱмтӱ**

Мортлӱн сьӱлӱмыд абу гудӱк, —  
Кыдзи кӱсъян тай он на ворс.  
Вывтӱ ышмӱмысь коркӱ кутӱ,  
Коркӱ ышнитлӱ бипур моз.

Олӱм дойяссӱ медводз кылӱ.  
Налӱн волӱмыс дыр оз вун.  
Тӱныд нимкодъ, и сйӱ сьылӱ.  
Зумыш, вошлӱ кор тӱнад нюм.

Мортлӱн сьӱлӱмыд абу гудӱк...  
Корся, ог аддзы сӱтшӱм кизь,  
Кодӱс личкан да сӱстӱм югыд  
Лоас оландыр, шог оз письт.

Мортлӱн сьӱлӱмыд абу небӱг...  
Он на лыдды тай, тӱдны мед,  
Мыйта сетӱма Енмыс эбӱс  
Олан гыяссӱ венны тӱд.

Коркӱ ӱзйӱ, а коркӱ чискӱ  
Олӱм олысьлӱн олан гор...  
Сӱки вежӱрнад лоан писькӱс,  
Ассыд сьӱлӱмтӱ кывзан кор.

## **Миан олөм**

Вын да сямлун серти эськө  
Овны колө,  
Чукля туяс мед эз веськөд  
Мортос олөм.

Өти нэмтө вуджны сідзи  
Колө, чайта,  
Медым мортлөн нимыс-вичыс  
Эз вош няитас.

Мортыс морт вылө мед эськө  
Эз жө зыртчы,  
Медым быдөн бурас эскис,  
Бурлань нырччис.

Водзвыв төдны кө тай кужин,  
Кытчө усян,  
Мөдлаті сэк туйсө вуджин,  
Дзоргин сюся.

Волө луныс, волө войыс  
Оландырад...  
Ёна көйы — сьөлөм дойыс  
Сэки бырас.

Мортлы мывкыдлун да вежөр  
Сөмын колө, —  
Оз сэк вильыд туяс кежөд  
Сійос олөм.

## **Ачыг асөн ло**

Лоны сөмын бурөн, шаньён  
Олөмас оз позь.

Быдөнлы он солён, няньён  
Керка өдзёс вост.

Кодкё кучкас, сэсся корё:  
— Лёсьöd мөдар бан...  
Оз позь лоны сөмын норён,  
Мед көть тэ и рам.

Быдёнсянь тай оз на вичмы  
Колігас бур кыв.  
Оз на олөмнымөс мичмөд  
Дзик быд сыланкыв.

Мед көть кодкё ыджыд чина —  
Мегырөн эн ло.  
Аслад вежөрөн на нимав,  
Дзайгысьödз эн во.

Лоны сөмын шаньён, бурён  
Некодлы ог си.  
Пөслукманлы пырджык сюрө  
Мөдлөн чорыд ки.

### ***Боргъя каг***

Тулыс, гожөм, ар да төв...  
Найөс кутысь эм-ө?  
Кадыс быгтьö биа ньөв  
Каттьö менсьым нэмөс.

Аски томджыкөн ог ло, —  
Кадыс водзö корö.  
Бара нин со өти во  
Содö арлыд дорö.

Кадыс быттьö биа ньöв, —  
Босьтлас весиг шемöс.  
Тулыс, гожöм, ар да төв...  
Найöс кутысь эм-ö?

### **Туйлы нимкодясь**

Туйыд нуас, туйыд ваяс,  
Сійö йитас сэт и тат.  
Эм кө төдса мусюр саяс,  
Гортсьыд пет да туйсö гарт.

Туйыд овлö веськыд, шыльыд, —  
Мыйöн көсьян — сійөн тюр.  
Ловтö кыпöдас став выльыс —  
Гулыд яг и паськыд нюр.

Но а веськалас кө гуран,  
Туйсö вождас кө шор, —  
Лёксö ордьяніныс сюрас,  
Сöмын туйсö эн вид, ёр.

Вуджны ковмас уна туй на,  
Кузь кө петас олан нэм.  
Но пыр нимкодясь да чуймав  
Сылы, мунан туй мый эм.

### **Колö бур сям**

Туйсö коді төдö,  
Бокиас оз кеж.  
Нуöдас на-й мөдöс,  
Нырвизьсö оз веж.

Йӱзлысь дой код кылӧ,  
Налы лёк оз си.  
Сьӱлӧм кудъяс сьлӧн —  
Мӱдӱс шонтысь би.

Лоны мӱдлы ёртӧн  
Оз на быд морт куж, —  
Оз кӧ лышкыд мортӧн  
Вӱльнӱй светас чуж.

Лышкыд йӱзсӧ тӱдлӱ...  
Восьтлӱ налы сыв.  
Ковмывлӱс кӧ, мӱдлы  
Корсьлӱ мелӱ кыв.

Водзӧ на мед пыкас  
Олӱмсӧ бур сям, —  
Сэки вензьӱм, зыкыс  
Оз-ӧ дзыкӱдз ям?

## ***Сиктса морт***

Сиктса мортыд быд удж вӱчас помӱдз:  
Заптас пес и гӱрас паськыд эрд.  
Ӑти лунӧн, чукӱртчас кӧ помеч,  
Вьль керкатӱ кышӱдас жӱ, дерт.

Сиктса мортыд абу дзайгысь, корысь, —  
Дзолядырсянь коскыс абу нюдз...  
Висьӱмъяссӱ вӱтлас небыд корӱсь,  
Пывсян кӱджас коляс лунся мудз.

Сиктса мортыд лёк йӱзкӱд оз воысь, —  
Ас кодыс жӱ авъя сьлӧн ёрт.  
Мукӱд, вакӱд дзолядырсянь олысь  
Тӱралӱ да видзӱ чужан горт.

**Сылөн —  
помасьлытём нэм**

Мичлуныдлөн абу арлыд,  
Сылөн — помасьлытём нэм.  
Колө сійө сиктлы, карлы,  
Колө сійө тэд и мен.

Мичлун сьökыд кадө доръяс,  
Мед и кольмөдлас тшөтш юр.  
Сійө зонлөн муслун горьяс  
Быттьö вьльөн шутём сур.

Важ йөз шулөмаось сідзи:  
Чужөм вылысь мич он ю...  
Көсья, медым быд морт видзис  
Пытшкөс мичлуныслысь дзу.

Өдйө лэбысь бордъя кадлы  
Сійө — талун, аски эм:  
Мичлуныдлөн абу арлыд...  
Сылөн помасьлытём нэм.

**Енмыс вөлөма на...**

Коркө өтчыд Эжва юө  
Вөйны куті.  
Быттьö вошис пемыд гуө  
Енэж чутыс.

Өти здукөн олөм-вылөм  
Вуджи вьльысь.  
Сэки вежөрөн и кылі:  
Вөя збыльысь.

Со нин вольной светыс кусо,  
Быро меным.  
Эбос войт ко эсько — юсо  
Верма венны.

Да од кысь тай сийос босьтан, —  
Лигышмуні.  
Тоди — Эжва сывсо восьтас, —  
Сэтчо сунны.

А ме они на пыр ола:  
Эг вей сэки.  
Чайти, Енмыс ачыс воліс —  
Кисо сетіс.

"Нэмыд тэнад эз на помась..." —  
Кодко долис.  
Эг ко кывтысь керъяс домась,  
Сэтчо-й коли.

## **ВЫЛЬ ГУДӨК МЕ ЛӨСЬӨДА**

---

### **Выль гудөк ме лөсьөда**

Вөлі менам варов хромка,  
Ок и ворслі лөсьыда.  
Гашкө, оз на пышйы том кад,  
Выль гудөк кө лөсьөда.

Тула карын вөчөмтор  
Оз куж дзевны мыла гор.  
Выль гудөклөн эзысь гор  
Асья кыаөдз оз ор.  
Асья кыаөдз оз ор,  
Оз кө гөтыр гортө кор.  
Төда: сійө абу вежөг,  
Гажөда көть нывъясөс, —  
Войпук ордым оз на кежөд  
Менө мөдлөн сывъясө.

Кадыс мед и вывті сёр,  
Гортө, Машукөй, эн кор.  
Небыд вольпаяд эн нёр,  
Лок тшөтш кывзы эзысь гор...  
Оз куж дзевны мыла гор  
Тула карын вөчөмтор.

Акань нылыс нюмдас гусьон, —  
Оз ков сьолөм юкалөм:  
Меным пөлөн коді шусьө,  
Со тай орчөн пукалө.

Кыла сөмын өтитор —  
Выль гудөклысь мыла гор.  
Көсья сөмын өтитор —  
Гөтыр узыны мед эз кор,  
Пытшсьыс кисьтис мыла гор  
Тула карын вөчөмтор.

### *Олөм тіпкөм кылысьяс*

Гажөдчыны тані кужоны  
Зоньясыс да нывьясыс...  
Волөй сэтчө, көні чужоны  
Мыла сыланкывьясыс.

Кулөмдінса сылысьяс —  
Олөм тіпкөм кылысьяс.  
Тіян гудөк шыясын —  
Енэж рөма тыясыс.  
Тіян ворсөм-йөктөмө  
Парма горсө өктөма.  
Кывбурьясас — олөмыс,  
Йөзлөн зільөм-колөмыс.

Гажөдчыны, майбыр, кужоны  
Татчөс зоньяс-нывьясыс.  
Батьсянь-мамсянь налы вуджоны  
Коми сыланкывьясыс.

Сылысьяс да йөктысьяс —  
Вирөс ворсны тшөктысьяс.

Юргысь "Марьямольясын" —  
Видзьясыс да ёльясыс.  
Кывза — лөня лолышта, —  
Томлуннас сэк олышта,  
Локтысь лунсö мичмöдны  
Кылысь гажсö вичмöда.

### *Сэни ю сайын*

Менам мусаёй,  
Вуджам ю сайö.  
Сэки тöдмала, радейтан он.  
Пöся кутыштла,  
Лөня пукыштам,  
Зэвтла вой кежлас кык вылö вон.

Вой, вой, вой,  
Кутшöм талун тэ мелі.  
Эн на тэрмась вай пышйыны, вой, —  
Медым шойчышгас пелыс.

Юлөн визулыс  
Дзевас из улö  
Сійöс, кывлас да аддзылас мый.  
Мелі кывъясөн  
Муслун тывъясö  
Он кө, нылукöй, көсйы, ог кый.

Кöка вой,  
Дырджык миянкöд олышт.  
Быдтор тöдлысь да аддзылысь вой,  
Тэ тшöтш муслунсö лолышт.

Лысва усьö да,  
Пыжö пуксьöда  
Тэнö, аканьöй. Эскы тэ мен.

Эжва катыдыс  
Сиктö катöда, —  
Чужом муслунсö ломзöдны сэн.

Гожся вой,  
Йитін сьölöмъяс кыклысь.  
Да и водзö на, мелі, лөнъ вой,  
Шудсö ныв-зонлы юклы.

### ***Вөлöма да кольöма***

Радейтлі ме нывъясöс,  
Кутлывлі пöсь сывъясö.  
Менам мелі кывъясöй  
Вөліны шөвк тывъясөн.

Тöдлі муслун сотчöмсö,  
Вонйö кыкөн кольччöмсö,  
Пемыд гидын сёдчöмсö,  
Вежөгтöмла ёрччöмсö.

Том кад öзъян сьölöмнас  
Олан пыжас сölöма,  
Олан туйяс пölöнас  
Кольöма, мый вөлöма.

Сэкса сыланкывъясыс —  
Бөрдысь гудök шыясын.  
Талун акань-нывъясыс  
Менам пиян сывъясын.

### ***Ставлы вичмысь муслун***

Быд морт көсйö радейтны, да пöся.  
Быд морт көсйö, радейтисны мед

Тшөтш и сійөс. Муслунтөг оз лөсяв  
Овны вольной светас мем и тэд.

Өтилөн со олөм сикөс-накөс,  
Мөдлөн важөн көдзалөма горт,  
Коймөд вөчас йөзлы лектор, пакөсьт, —  
Сылы шуштөм, оз кө ви да сот...

Татшөмъяслы муслуныс эз вичмы.  
Муслун-юыс косьмис, кыдзи вис...  
Өтка олөм сьөлөм вылад личкө,  
Өтка олөм — морөс вылад из...

Медся көдзыд кадас шонтас муслун.  
Сійө ставлы — мам и бать, и Ён...  
Чужөмсяньным кувтөдз мед оз куслы  
Помтөм муслун сылы, тэныд, мен.

### ***Менам гиль-голь***

Виччысяна гиль да голь  
Шуас өдзөс кольча,  
Зонмөс өтнассө ог коль, —  
Пета сылы воча.

Гиль-голь гольгы,  
Сэтчө кор,  
Көні зельгө  
Изъя шор,  
Көні пестөг  
Зонкөд ми  
Өзтам-пестам  
Муслун би.

Вошта окыштчөмлысь лыд  
Пашкыр сус пу дорас...

Пуксяс аски гоҗся рыт, —  
Гиль-голь бара корас.

Корас сэтчө,  
Көні лөнь,  
Көні гартчө  
Эҗва вөнһ...  
Сэні пестөг  
Зонкөд ми  
Өзтам-пестам  
Муслун би.

Мамук, менө тэ эн кут, —  
Сьөлөмөй өд өзйө.  
Гиль-голь меным гаж да шуд  
Бара нин со вөзйө.

Ковтөмторсө,  
Мам, эн доль...  
Кольча ворсө —  
Гиль да голь.  
Мусук воис,  
Ой-ой-ой!  
Лун кодь лоис  
Пемыд вой.

## ***Менам оз тусьöй***

Ыдждөдлі ме сэки тэнö оз тусьөн...  
Мөдъяскөд тай сөмын асьным поздысим.  
Эг ми кужöй мөвпавны, мый муслунным  
Вермас öтик здук кежлө и куслыны.

Медым сэсса нэм чөж миян вөтъясө  
Волыны, көть окалам ми мөдъясөс.

Ог нин босьтлөй өта-мөдөс сывъясө, —  
Мөдъяссиянь ми быдтам акань нывъяссө...

### **Кызь во бөрын**

Кызь во бөрын сывъясын  
Тэно кутла.  
Тэнад мелі кывъясысь  
Сьолөм сувтлас.

Кызь во бөрын мездорө  
Тэно босьта.  
Оз тусь кодь гөрд вом дортө  
Меным востан.

Кызь во бөрын томлунас  
Тэкөд волам...  
Войдөр шуны колөма:  
— Тэ мен колан...

Кызь во бөрын гусьөн ми  
Мусукасям...  
Сир пөртйын мед пусыны, —  
Ме тай дась-а.

Кызь вочөжся водзөссө  
Муслуныслысь  
Босьтам помөдз, водзөсө  
Озкө куслы.

Кызь во бөрын сывъясын  
Тэно кутла.  
Тэнад мелі кывъясысь  
Сьолөм сувтлас.

## **Арся сьыланкыв**

Мед и арся зэрыс кӧдзыд,  
Мед и арся зэрыс кузь.  
Тӧда: вӧрса ёлыс сӧдзас,  
Лэбзяс лунвылӧ кор юсь.

Менам ныв чин оз-ӧ усь,  
Лэбзяс лунвылӧ кор юсь?

Енэж юкмӧссӧ оз косьты  
Зэрӧн ойдӧм букыш ар.  
Мусук кӧтасьӧма – восьта  
Ӧдзӧс, пыр вай, Ен и Сар.

Лок, лок, менам Ен и Сар –  
Воис кӧлысьяса ар.

Юмов сурьыс мед оз шоммы,  
Кадсӧ нюжӧдны ог кут:  
Сиктысь медся удал зонмыс  
Зарни арын вӧзъяс шуд.

Джуджыд менам сьӧлӧм куд,  
Уна тӧрас сэтчӧ шуд.

## **А тэ бергӧдчин да мунін...**

Коркӧ вӧлін ӧд тэ томӧн,  
Коркӧ вӧлін ӧд тэ ён.  
Вуджны нельысь Эжва вомӧн  
Сиктысь вермис ӧти зон.

Коркӧ вӧлін ӧд тэ статья.  
Вильыд туй вылас эн пет.

Сиктысь медшань нылыс, Катя,  
Ассьыс сьӧлӧм вӧййис тэд.

А тэ бергӧдчин да мунін, —  
Чайтін, шудсӧ сетас мӧд.  
Олӧм визулас кор сунін,  
Пыр на шензян, кыз эн пӧд.

Сьӧлӧм кудъяд пыр на видзан  
Воштӧм муслуныслысь гор.  
Сідзи ылӧсас и лэбан,  
Кытчӧдз олан туй оз ор.

### ***Кыкӧс он шонты***

Менӧ коран кӧ, вола.  
Пӧся окышта, кутла...  
Кызкӧ тэтӧг тай ола, —  
Аддза, сьӧлӧмӧй сувтлас.

Кӧть и дзор нин со ачым,  
Гусьӧн тэ дорӧ ветла.  
Аслым ас водзын яндзим,  
Додь вож костысь кор петла.

Кыз нӧ сьӧлӧм оз ёнты,  
Кор тай кык аньлы колан.  
Кыкӧс ӧтног он шонты...  
Коран? Бӧръяысь вола.

## **Зарни кӧлысь**

*(Ёгор пӧльӧн висьталӧм серти)*

Мед эз тӧдлыны, съӧд войӧ  
Гусьӧн вийӧда аскур.  
Сэсся тшӧкта ыджыд чойӧс  
Шутны чӧскыд тагъя сур.

Ассьым, чойлысь вӧчӧмтортӧ  
Ог на вузавны ме ну.  
Ог ӧд нимав ышмысь мортӧн,  
Ог на дорвыв мый эм ю.

Мыжаыс ӧд тувсов тӧлысь, —  
Со тай таялӧ нин дзик...  
Ок, и пасьям зарни кӧлысь  
Ме да гӧтыр, да дзонь сикт.

Ставлы тырмас "тэрыб" сурыд, —  
Волӧй быдӧн, юкӧй гаж.  
Тшӧкыджыка горзӧй: "Курыд!",  
А ми гозъя — вуш да ваш.

Сийӧй шудсӧ сё во кежлӧ  
(Овны кӧсйӧм — абу теш).  
Пӧлӧс мӧд вылӧ эг вежлыв,  
Да и водзӧ на ог веж.

## **Эн на вун**

Воас рыт, да он мен вольсась.  
Мӧдлы козьналан тэ нюм...  
Ӧтув шонтӧм турун вольпась  
Ме нам некыдзи оз вун.

Мөдлөн мездорын тэ курган, —  
Менам сывъясö он сун.  
Коркө, гашкө, сьөлөм бурдас,  
Но а талун эн на вун.

## *Чужаниныг пыр на шонтас*

Тани муыслон щорыс .....	3
Коми морткод сёрни .....	4
Гортын .....	5
Коми да Русь .....	6
Лышкыдлун .....	6
"Эн кө..." .....	7
Вура тюни .....	8
Кывза пармалысь мойд .....	9
А ме сулалі шемос .....	9
Дзодзюглы .....	10
Кöлысь гора улича .....	10
Чужанинкод сёрни .....	11
"Комиын ола..." .....	13
Отув овнысö .....	13
Сыктыв юй, Сыктылöй .....	14
Öзйис востым .....	14
Войвыв мукöд .....	15
Олöмыс песö .....	15
"Öкта лысвасö войт бöрся войт" .....	16

## *Тöдлам олöм дойяссö*

Тöдлам олöм дойяссö .....	17
Эн менö ёр .....	18
Воны öти кывйö .....	19
Нэм олöма .....	19

Вола сиктö .....	20
Эска аския лунас .....	21
Жугыль мөвпгъяс .....	22
Олан вуж эн берт .....	23
Челядьдырас вола .....	23

***Сагъми кыакöд со тай...***

Пармалöн мойд .....	25
Пывсян ломта .....	26
Нюжöдiс нэм .....	27
Видз вылын .....	28
Майбыр .....	29
Менам ордым .....	29
Мамлöн кияс .....	30
Пыр мыйкö колö .....	31
Кодi повзис? .....	31
Коми оласног .....	32
Кöни пармаыс дзор .....	32
Корö вöртас .....	33
Вунлытöм пас .....	34
Гожöм йылысь вöт .....	35
Гожся войтъяс .....	35
Колö идöрлун .....	37
Бокысь воём ёрталы .....	38

***Кöкöй, лыдгы менсьым вояс...***

Мекöд тшöтшгъялы .....	40
Корсь сэтшöм муслун .....	40
Öта-мöдды олам .....	41
Кöка войяс .....	42
Батьлöн, мамлöн велöдöм .....	42
Кывзы сьöлöмтö .....	43
Миян олöм .....	44
Ачyd асөн ло .....	44
Бордъя кад .....	45
Туйлы нимкодьясь .....	46
Колö бур сям .....	46
Сиктса морт .....	47
Сылöн — помасьлытöм нэм .....	48
Енмыс вöлöма на .....	48

**Выль гудѡк ме лѡсьѡда**

Выль гудѡк ме лѡсьѡда .....	50
Олѡм тѡпкѡм кылысьяс .....	51
Сэні ю сайын .....	52
Вѡлѡма да кольѡма .....	53
Ставлы вичмысь муслун .....	53
Менам гилы-голь .....	54
Менам оз тусьѡй .....	55
Кызь во бѡрын .....	56
Арся сьыланкыв .....	57
"А тэ бергѡдчин да мунѡн..." .....	57
Кыкѡс он шонты .....	58
Зарни кѡлысь .....	59
Эн на вун .....	59

## **Литературно-художественное издание**

**Виталий Васильевич УЛЯШЕВ**

### **А МЫ НА СЕВЕРЕ, В КОМИ ЖИВЕМ**

*Стихи на коми языке*

Редактор *И. И. Белых*

Художник *Г. Н. Шарилков*

Художественный редактор *В. Б. Осипов*


Технический редактор *А. Н. Вишнева*

Корректор *Н. Ф. Габова*

ЛР № 010039

Сдано в набор 12. 01. 95. Подписано к печати 07.02.95.  
Формат 70x108<sup>1/32</sup>. Бумага № 2. Гарнитура "Балтика".  
Печать офсетная. Усл. печ. л. 2,8. Усл. кр.-отт. 3,06.  
Уч.-изд. л. 2,41. Тираж 1200. Заказ № 175. Коми  
книжное издательство. 167610, г. Сыктывкар, ул.  
Карла Маркса, 229.

АО "Коми республиканская типография". 167610, г.  
Сыктывкар, ул. Первомайская, 70.



1000 =



ВИТАЛИЙ ВАСИЛЬЕВИЧ УЛЯШЕВ чужліс 1946  
воын Кулѳмдін районса Керчомъя сиктын. 1965 восянь  
кутіс уджавны Кулѳмдін районса "Ленин туйд" (ѳні  
"Парма гор") газетын. Вѳлі литсотрудникѳн,  
ответственнѳй секретарѳн, редакторѳс вежысьѳн. Тайѳ  
газет бердас "Эжва" литѳбьединение котыртысьясысь  
ѳти. 1974 восянь уджалѳ государственнѳй безопасность  
органьясын.

Сылѳн кывбурьяс кадысь кадѳ петавлісны "Войвыв  
кодзув" журналын, "Коми му" да "Парма гор"  
газетьясын. Тайѳ кывбура небѳгыс В. В. Уляшевѳн  
медводдза.